

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXV No. 13
Hulyo 7, 2004
www.philippinerevolution.org

Editorial

Pahabok kag mapaniplang ang 10-punto programa sang rehimeng Arroyo



Isa ka pahabok kag pagpaniplang ang ginapabugal ni Gloria Arroyo nga 10-punto nga programa. Wala ini sang iban nga tuyo kundi tiplangon ang pumuluyo kag takpan ang pagka-inutil sang rehimen nga sakdagon ang interes sang kadam-an nga pumuluyo. Dala sini ang mas masingki nga pagpanghimulos kag pagpami-gos sa pumuluyo sang mga buyong nga dalagku nga dumuluong kag lokal nga kapitalista, asendero kag buruk-rata kapitalista. Wala ini sang iban nga igadul-ong sa pumuluyo kundi dugang nga kaimulon kag pagpami-gos.

Luwas sa mas matayog kag labing indi mapatihan nga mga pangako, ang 10-punto nga programa ni Arroyo wala sing kinalis sa daan nga paltik nga mga promisa nga bungat niya sa iya *state of the nation address* sad-tong Hulyo 2003. Wala sang natuman anuman didto. Pat-ud nga wala man sing malauman sa bag-o niya nga deklarasyon.

Padayon ang malaparan nga pag-kawasak sang mga produktibong pwera kag pagtibusok sang produk-syon. Ginasisagahum maabot sa P200 bilyon ang depisit sa badyet. Padayon

**Mga tampok
sa isyu nga ini...**

**Sugilanon pangkalinu-
ngan, nakapahina-buot**
PAHINA 3

Chacha, adyenda sg US
PAHINA 4

**Ka Argie: Hangaway
nga medik** PAHINA 8

nga nagadaku ang depisit sa negosyo, ang daw higante nga utang sang gubyrno kag pangguwa nga utang sang Pilipinas. Gani wala sang makuhaan sang pondo nga galastuhon sa mga target ni Arroyo.

Mismo ang mga burges nga ekonomista nagahikay sa 10-punto nga programa ni Arroyo. Siling nila, masyadong ambisyoso kag wala nakabase sa reyalidad ang mga gintalana nga target ni Arroyo. Ginatimbang nila ang subong nga kahimtangan sang ekonomya sa dalagku nga problema. Ang sobra nga matayog nga target ni Arroyo, kon usisaon, patimaan sang sobra-sobra man nga desperasyon nga tiplangon ang pumuluyo.

Lakip diri ang pangako ni Arroyo nga makatuga siya sang 6-10 milyon nga trabaho. Kon ang daan nga promisa magatuga sang isa ka milyon nga bag-ong trabaho wala matuman, ano ang malauman subong nga pareho sang nagtaliwan wala sang anuman nga katuwang nga plano nga tapuson ang mga makidumuluong nga polisiya nga nagapatibusok sa lokal nga produksyon kag nagabunga sang malaparan nga disempleyo sa pungsod?



Kon may makuha nga trabaho, ini lunsay kontraktwal nga magadugay lamang sang tatlo ukon lima ka bulan kada tuig; ukon indi gani mga di substantibong trabaho nga ginahatag sang gubyrno pareho sang pagpanilhig sa karsada.

Sa pihak sang madalum nga pagtibusok sang mga matag-adlaw nga galastuhan, nagapakatig-a ang rehimeng Arroyo batuk sa pagpataas sang sweldo sang mga mamumugon. Piyong ang mata kag sardo ang bibig sini sa atubang sang sunod-sunod nga pagsinaka sang presyo sang gasolina, sang balayran sa kuryente, tubig kag expressway. Malala pa, ginabuko sini nga magpatuman sang mga dugang nga buhis nga magasampaw pa sa

tuman na kabug-at nga palas-anon sang masang anakbalhas.

Wala pulos ang ginapabugal sini nga pag-uswag sang agrikultura. Wala sang pag-uswag nga maangkon sa kaumhan kon padayon nga indi ipatuman ang tunay nga reporma sa agraryo kag tigaylo labi pa nga pabaskugon ang monopolyong gahum sang mga daan kag bag-ong tipo nga agalon nga mayduta kag kumprador burges.

Bangud sa neoliberalisasyon sa agrikultura nga ginasakdag ni Arroyo, ang kaumhan labi pa nga naghapaon sa pagkaatrasado kag kaimulon. Ang malaparan nga pagtambak sa pungsod sang mga dumuluong nga produktong agrikultural kag mga mahal nga imported nga sangkap pareho sang binhi, abono, pestisidyo, kag iban pa nagapatay sa lokal nga produksyon kag nagabunga sang pagkaputo sa mga mangunguma. Wala sang malauman nga pag-uswag sa kaumhan kundi yadtong padipusan sang mga dalagku ng dumuluong nga monopolyong korporasyon sa agribisnes kag dalagku nga komprador kag agalon nga mayduta.

Wala sing napapati si Arroyo sa ginapabugal niya nga "balansyang pungsodnon nga badyet." Diin niya kuhaon ang pondo? Sa kadakuon sang depisit sa badyet, pat-ud nga pumuluyo ang lubos nga mapuga sa kadamu sang igapatuman nga dugang nga buhis kag himuon ang pagkinot sa mga serbisyo sosyal. Agud mahatagan sang bag-o nga utang, labing magaluhod-luhod ang himuon sini sa IMF. Kag sa diin naman ini makadto? Diin pa kundi sa paggasto sa nagadaku nga galastuhon militar kag sa pagbayad sa utang sang gubyrno kag utang pangguwa sang pungsod. Diin pa kundi sa bulsa sang mga garuk nga upisyal sang gubyrno?

Kag ano ang ginahambal ni Arroyo nga "matarung nga pagtapos



Tuig XXXV No. 13 Hulyo 7, 2004

Ang *Ang Bayan* ginabantala sa lengwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa Philippine Revolution Web Central nga makit-an sa:

www.philippinerevolution.org.

Nagabaton ang *Ang Bayan* sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.

Malab-ot kami paagi sa e-mail sa: angbayan@yahoo.com

Kaundan


Editorial

Pahabok kag mapaniplang ang 10-punto programa ni Arroyo	1
Sugilanon pangkalinungan	3
Plano pag-amyenda sa konstitusyon	4
Kampanyang militar sg BHB sa Panay	5
Rebolusyong agraryo sa Central Luzon	6
Ka Argie: Hangaway nga medik	8
Sistema sang edukasyon	9
Pondo sang pasista	10
Mga pakita tawo ni Arroyo	10

Sa luwas sang pungsod

Papet nga gubyrno, gintukod sa Iraq	11
Balita	12

Ang *Ang Bayan* ginabantala duha ka beses kada bulan sang Komite Sentral sang Partido Komunista sang Pilipinas.



sang proseso pangkalinungan"? Sa nagligad nga pagsugilanon sa Oslo, Norway, ginpamatud-an sang rehimen nga indi ini matuod nga ser-yoso nga angkunon ang kalinun-angan. Ang pakipagnegosasyon sang rehimeng Arroyo wala sang iban nga katuyuan kundi tiplangon, ipresyur kag pasurenderon ang rebolusyonaryong hublag. Nagapabaya-baya ini sa pagpatuman sang mga kasugtanan samtang padayon nga nagapakatig-a sa mada-mu nga importanteng punto. Wala sang maangkon nga kalinungan kon wala sang paglubad sa mga halambalanon nga ugat sang gera sibil kag kon padayon nga pasingki-on ni Arroyo ang "gera kontra-terorismo" kag mangindi nga atubangon ang mga halambalanon pangkatilingban kag pang-ekonomya nga amo ang yara sa likod sang nagasulong nga inaway banwa. Kon padayon nga magpakatig-a si Arroyo, wala sang maangkon nga signipikanteng pagsulong sa sugilanon pangkalinungan.

Samtang padayon nga nagabalibad ang rehimeng US-Arroyo nga lubos atubangon ang mga ugat sang gera sibil, padayon naman ini sa pagpangaluyag sa mga reaksyunaryong karibal sa pulitika. Gusto kuno sini "isara ang libro" sang mga pag-alsa sang pumuluyo nga nagpukan sa mga ginakangil-aran nga rehimeng Marcos sadtong 1986

kag Estrada sadtong 2001, pero indi padulong sa pag-angkon sang hustisya para sa pumuluyo kag paghatag sang nagakaangay nga silut sa mga kasal-anan sa banwa. Ang pag-aregluhanay sa mga Marcos kag kay Estrada, kag mga ginatanyag nga suhol sa mga kaaway sa pulitika labi nga nagagatong sa lapnagon nga pagkaakig sang pumuluyo sa baraghal nga pagdinaya ni Arroyo sa nagligad nga eleksyon.

Sa pagpatuman sang rehimeng Arroyo sang mga polisiya nga labing mapiguson sa pumuluyo kag nagaluhod-luhod sa imperyalismong US, labi man sini ginaduso ang pumuluyong Pilipino nga maghugpong agud tapuson ang iya pagginahum. Gusto man nga isara na ni Arroyo ang "libro sang mga pag-alsa sa EDSA," pat-ud nga

magaatubang ini sa panibag-ong mga pag-alsa kag sa labing pag-abante sang rebolusyonaryong armadong paghimakas sang pumuluyo nga tuman na nga nagaantos kag puno na sang kaakig sa garuk nga reaksyunaryong gubyerno kag sistema.

Ang nagapalala nga krisis sang nagaharing sistema nagahatag tum-ok sa kakinahanglanon sang rebolusyonaryong paghimakas agud ipakig-away ang pungsodnon kag demokratikong interes sang pumuluyo.

Solo ang programa para sa pungsodnon-demokratikong pagbag-o nga ginasulong sang Partido Komunista kag mga rebolusyonaryo kag progresibong pwersa ang magalubad sa pinakadaku nga problema sang pumuluyong Pilipino. AB

Ikatlong *round* sang sugilanon pangkalinungan, nakapahina-buot-JMS

Nakapahina-buot!" Ini ang pahayag ni Jose Maria Sison, *senior political adviser* sang NDFP *negotiating panel*, kaangot sa ikatlong *round* sang pormal nga sugilanon nga ginhiwat sa Oslo, Norway sadtong Hunyo 22-25. Naghisugot ang duha ka bahin sa pila ka importanteng bagay pero ginpunggan sang GRP *peace panel* ang pagtingub sang mga ini sa isa ka dokumento. Base sa kondukta sang ila panel kag sa mga ginahambal kag hulag sang mga upisyal sang gubyerno sa guwa sang negosasyon, nagsulod lang ang GRP sa ikatlong *round* sang paghambalanay para magpakitang-tawo antes ang inagurasyon ni Arroyo bilang presidente kag tugahon ang ilusyon nga interesado pa ang rehimeng Arroyo sa sugilanon pangkalinungan.

Masyado nga nagpahambog ang rehimeng Arroyo kag ginapakita sini nga indi kinahanglan makigsugilanon sa rebolusyonaryong kahublagan, siling ni Sison. Nagpaandam siya nga kon indi seryosohon sang GRP ang mga nahisugtan sa ikatlong *round*, mahimo magalala ang relasyon sang duha ka panel.

Suno sa GRP, sarado na ini sa paghimo sang anuman nga tikang angot sa pagkuha sa PKP, BHB kag kay Sison sa listahan sang US sang mga "terorista". Napulo pa gid lang ang bilanggo pulitikal nga ginhilway sang GRP sa 32 nga ginpangako sini hilwayon halin sa kabilugan nga 300 nga isip sang mga detenido pulitikal. Wala man sang natabo sa ginpangako nga pag-areglo sang danyos perwisyo sa mga biktima sang diktaduryang Marcos. AB

Adyenda sang US ang plano pag-amyenda sa konstitusyon

Ang ginaplano nga "cha-cha" (*charter change*) ukon pag-amyenda sa reaksyunaryong konstitusyon amo ang isa subong sa mga gilayon nga adyenda sang imperyalismong US sa Pilipinas.

Gani nagakupog-kupog naman subong si Gloria Macapagal-Arroyo, katuwang ang suod niyang taga-suporta, nga hugpungon ang mga reaksyunaryong pulitiko sa plano nga ini. Labi man nga nagadali si Arroyo bangud sa tanan nga mga reaksyunaryong pulitiko, siya ang pangunahon makapadipulos diri.

Ginapatampok sa subong nga halambalanon nga planong pag-amyenda sa konstitusyon ang pagbag-o sa porma sang pagdumalahan-halin sa subong nga sistemang presidensyal padulong sa sistemang parlamentaryo. Pero ang halambalanon sa pagbag-o sa porma sang gubyerno sa idalum sang subong nga sistema pang-pulitika kag pangkatiling-ban may kabilinggan lang para sa mga reaksyunaryo. Ginaresolbar lang sini ang halambalanon sang

mga pamaagi sa matawhay nga pagbahin-bahin sa kontrol sa poder.

Ang mas importante nga halambalanon sa "cha-cha", sa kamatuoran, amo ang mga plano nga dulaon ang mga deklaradong prinsipyo sang pungsodnon nga patrimonya kag kahilwayan agud hatagan-dalan ang lubos nga dominasyon sang imperyalismong US sa pangabuhian ekonomiya, pulitika kag militar sang Pilipinas. Indi lipod ang adyenda sang US nga panason paagi sa "cha-cha" ang pagdumili sa pagtukod sang mga dumuluong nga base militar, sa pagsulod sang mga dumuluong nga tropa nga wala tratado kag sa pagpasulod sang mga armas nukleyar. Tuyo man sini nga dulaon ang mga nabilin nga probisyon batuk sa dumuluong nga pagpanag-ya sang mga kadutaan kag sa 100% nga pagpanag-ya sa

mga empresa; kag kuhaon ang gahum sang mga korte nga maghusga sa mga pang-ekonomyang halambalanon.

Tuyo man sang US kag mga lokal nga idu-idu sini nga dulaon ang mga pormal nga kinamatarung sibil sang pumuluoyong Pilipino kag isimon sa konstitusyon sang

Pilipinas ang doktrinang "anti-terorismo" sang US, kag hatagan-dalan ang mga pasistang layi kag orden pareho sang National ID System para mas madali

tapnaon ang pumuluyo.

Madumduman nga nangako si Arroyo sadtong panahon sang kampanya nga kon magdaug manaog siya bilang pangulo sa 2007 agud hatagan-dalan ang pagsugod sang parlamentaryong sistema sang gubyerno. Gusto lang niya sadto pagguwaon nga indi siya daluk sa gahum kag makuha ang simpatiya sang mga botante. Pero pila ka oras pa lang matapos manumpa sadtong Hunyo 30, ginbawi na niya ang promisa nga ini. Pagkatapos gid lang maplantsa ni Arroyo ang "ligalidad" sang bag-ong termino niya, plano na gilayon niya ang iban naman nga pamaagi para sa panibag-ong ekstensyon sang iya pagginahum. Nagpalahid-lahid man siya nga bukas sa panugyan nga magpungko bilang presidente kag *prime minister*, pareho sang diktador nga si Marcos sadtong 1978. Labi lang sini ginapaakig ang pumuluyo kag ginagatungan ang masingki nga away sa kubay sang mga nagaharing guban.

Ang mga progresibong partido kag mga demokratikong organisasyong masa nagapanguna sa paghulag sang pumuluyo batuk sa "cha-cha". Husto ang ila panindugan nga ang "cha-cha" magaserbi lang sa interes sang dumuluong nga kapital kag mga nagaharing sahi kag magatuga lamang sang labi pagpabudlay kag pagpamigos sa pumuluoyong Pilipino.

Husto man nila nga ginatumukan nga kinahanglan anay atubangon ang mga gilayon nga halambalanon sang nagalala nga krisis sa pangabuhian, pagdalum sang kaimulon kag iban pa nga problema sang pungsod kag sang pumuluoyong Pilipino dala sang sunod-sunod nga pagtaas sang presyo sang mga basehang balaligyaon kag serbisyo, kawad-on sang trabaho, padayon nga pagtibusok sang balor sang ila sweldo kag kita, padayon nga militarisasyon kag paglapas sa mga tawhanon nga kinamatarung, ginapunggan nga mga kinamatarung sa pagpahayag kag iban pa.



Mga leksyon sa kampanya militar sang BHB sa Panay

Ang suporta sang masa amo ang yabi sa madinalag-on nga pagsalakay sang BHB sa munisipyo kag istasyon sang pulisya sa Tubungan, Iloilo sadtong Hunyo 15. Suno kay Julian Paisano, tagapamaba sang Coronacion "Waling-Waling" Chiva Command sang BHB-Panay, ang malapad nga masa sang mangunguma kag iban pang sektor ang nagsakdag sa mga Pulang hangaway sa bilog nga proseso sang paghanda sang taktikal nga opensiba kag, sa tiron mismo sang operasyon, nagtago sa nagaabanteng hangaway tubtub pagpalapit na sini sa target. Ginhimo nila nga bungol kag bulag ang kaaway gani nangin madinalag-on ang reyd.

Presisyon, organisasyon kag disiplina. Madamu ang nagdayaw sa presisyon, organisasyon kag disiplina sang BHB sa pagdisarma sang mga pulis, pagpat-ud nga wala sang sibilyan nga malamita kag sa talunsay nga pag-atras sang mga pwersa sini. Sa sulod sang 35 minutos, madasig nga gintapos ang opensiba mismo kag organisadong nakaatras ang mga Pulang hangaway dala ang mga nakumpiskang armas, mga bala kag iban pang kagamitan militar. Pila ka oras pa ang naglipas bag-o makahulag ang reimporsment sang kaaway bangud sa dakung kakulba sang mga ini nga maambusan sang mga yunit sang BHB.

Bandang ala-una sang hapon sang sudlon sang BHB ang munisipyo. Gilayon gindeploy ang *blocking forces* sa tatlong ruta pasulod kag pagguwa sang poblasyon. Laum sang mga pulis, mga empleyado sang munisipyo kag mga nagaseminar nga CVO nga mga tropa sang Philippine Army ang nag-abot.

Wala hinalung-ong ang mga pulis nga masako sa pagtan-aw sa telebisyon sang mainit nga isipay sang mga boto para sa presidente kag bise-presidente kag sa pamahog na destabilisasyon. Nakibot na lang sila sang nag-abot ang mga Pulang hangaway kag dinisarmahan sila sang mga ini. Dungan nga nakontrol sang iskward Abe ang *staff house* (nga nagserbi man *guard house* nga na-

hamtangan man sang mga armas kag *base radio*) kag sang iskward Kaloy man ang atubang nga bahin, kag ang una kag ikaduhang panalغان sang munisipyo. Ginpahapa ang mga nabihag nga pulis kag ang mga empleyado. Kadungan sini, gin-asolt kag gilayon nakon-trol sang iskward Bakang ang istasyon sang pulisya.

Operasyon nga wala lupok ang orihinal nga plano sang BHB. Pero sang magkulong sa iya upisina ang hepe sang pulis kag magpalupok sang iya M16, napilitan man magbalos lupok ang BHB. Samtang nagabayluhanay sang mga lupok, ginabuyok sang BHB kag pati sang mga tinawo niyang pulis nga magsurender na lang ang hepe kag indi man siya anhon. Naglawig sang tunga sa oras ang lukpanay. Sang ulihi, nakasaka sa ikaduhang panalغان ang hepe kag ginhimo niya nga panaming ang mga sibilyan. Sa amo nga sitwasyon, namat-ud ang kumand nga mag-atras na lang para wala sang malamita nga sibilyan. Ginhatagan sang medik sang BHB sang pauna nga tambal ang isa ka empleyado

nga napilasan tuga sang nabuong nga salaming. Sa kabilugan, isa ka oras ang ginlawig sang taktikal nga opensiba-halin sa lunsaran tubtub sa pag-asolt, pagdisarma sa kaaway kag pag-atras sang bilog nga pwersa.


Regulasyon sang BHB. Maayo nga napakita sang mga Pulang hangaway sa mga nabihag nga pulis kag sa mga empleyado sang munisipyo ang mataas nga lebel sang disiplina kag hugot nga pagsunod sa mga pagsulundan sang rebolusyonaryong hublag kag mga internasyunal nga kumbensyon kag protokol sa Geneva kaangot sa mga tawhanon nga kinamatarung kag sa maayo nga pagtrato sa mga *hors d'combat*. Samtang ginagapos ang mga dinisarmahang pulis, ginahambalan sila nga mga armas lang nila ang kinahanglan sa ila.

Nagpanagtag man ang mga Pulang hangaway sang pila ka kopya sang *Ang Bayan* kag mga polyeto sang Napoleon Tumagtang Command (kumand sang nasakpan nga prenteng gerilya) sa mga pulis kag empleyado, kadungan sang pagpaathag bahin sa ginasulong nga rebolusyonaryong kawsa sang pumuluyo.

Nagtanum sila sang duha ka bandera sang Partido Komunista sang Pilipinas sa atubang sang munisipyo sang Tubungan antes sila umatras. Ginkuhaan sang mga retrato kag bidyo kag ginrekord sa *tape* ang bilog nga proseso sang pag-asolt tubtub pag-atras sang mga pwersa.

Antes ini, ginreyd sang BHB ang E.C. de Luna Construction sa Barangay Partition, Guimbal, Iloilo. Ginsalakay sang isa ka pinagamay nga platoon sang BHB ang *compound* sang kumpanya bandang 10:00 sang gab-i sang eleksyon. Ginsilutan ang kumpanya sa indi pagbayad sang rebolusyonaryong buhis. Kinumpiskahan man sang duha ka baril ang mga gwardya.

Naani nga kagamitan militar.



Nakatipon ang BHB sang 18 armas sa duha ka bulan nga kampanya militar sa nasambit nga prenteng gerilya. Halin sa Tubungan ang 15 sa mga ini: walo ka M16, isa ka M14, tatlo ka pistolang 9 mm, isa ka pistolang Super .38, isa ka *pistolized shotgun* kag isa de-12 *pugakhang* (lokal nga *shotgun*).

Nakumpiska man ang narisaring magasin kag bala, tatlong *rifle grenade*, isa ka *base radio*, duha VHF *handset* kag iban pang gamit militar. Nakuha man sa De Luna Construction ang isa ka *shotgun* kag isa ka .38 rebolber.

Pila ka leksyon. Luwas sa epektibong paggamit sang superyor nga pwersa kag elemento sang sorpresa, malahalón nga bahin sang paghanda para sa reyds sa Tubungan ang madamu nga paghanas nga ginagyan sang mga hangaway kag upisyal nga nagpasakup diri. Nag-agi sila sa Batayang Kursong Pulitiko-Militar (BKPM) kag *intelligence and operati-*

ons study conference para sa mga kadre kag upisyal militar. Antes ilunsar ang kampanya militar, nagensayo sila sa pagbasa sang mapa, naglunsar sang mga *dry run* kag naglantaw sang mga bidyo bahin sa mga taktika kag teknika sa mga reyds. Nagserbing *dry run* para sa mga Pulang hangaway ang reyds sa E.C. de Luna Construction para sa mas daku kag madinalag-on nga pagsalakay sang Tubungan Police Station.

Mapisan man nga gintun-an sang mga Pulang hangaway ang Comprehensive Agreement on Respect for Human Rights and International Humanitarian Law (CARHRIHL) ilabi sa halambalanon sang husto nga pagtrato sa mga sibilyan kag napasunder nga kaaway.

Bag-o kag matapos ang reyds sa Tubungan, naglunsar ang BHB sang mga kampanya pangpulitika kag pangkultura agud pataason ang moral kag makig-away nga panimuot

sang BHB kag masa sa lugar.

Maayo man nga nahimuslan sang BHB ang masingki nga bangaan sa tunga sang mga reaksyunaryong pulitiko kag mga kahimbon nila sa militar kag pulisya. Masako ang mga upisyal kag yunit sang AFP kag PNP sa pagpagamit sa ila ginapaboran nga mga pulitiko, pagpadihot batuk sa mga karibal nga kandidato kag pagpamatyang sa ginakakulbaan nga destabilisasyon sa mga syudad kag kabisera.

Labaw sa tanan, yabi sa pagdaug sa nagligad nga kampanya militar ang mabaskog kag malapad nga suporta sang masa sa rebolusyonaryong armadong paghimakas. Wala kakapoy ang pagsakdag kag pagsiguro sang masang mangunguma kag iban pang pumuluyo sa seguridad samtang tipon ang daku nga pwersa sang BHB sa mahaba-haba nga panahon sang paghanas kag pagtuon humalin Abril tubtub sa aktwal nga paglunsar sang mga taktikal nga opensiba. **AB**

Nagasulong ang rebolusyong agraryo sa Central Luzon



Signipikante na ang mga kadalagan nga naangkon sang masang mangunguma sa pagpasulong sang antipyudal nga paghimakas sa Central Luzon.

Partikular sa Nueva Ecija, nagsugod na nga magsakop sa bilog nga prubinsya ang nagkalain-lain nga kampanya sa pagpanubo sang arki-la sa duta, pagbato sa usura, pagpataas sa suhol sang mga mamumugon sa uma, pagpanubo sa renta sa makinarya kag pagpataas sang presyo sang kamatis, humay kag iban pa nga produkto sang mangunguma.

Magaabot sa masobra 4,000 mamumugon sa uma sa 13 baryo sa tatlo ka banwa ang nakabenepisyo sa mga kampanya nga ini.

Pinakamapagsik ang paghimakas agraryo sa isa ka bahin sang anum ka banwa sa prubinsya. Sa isa ka banwa diri, siyam ka ektaryang duta sang agalon na mayduta ang ginpusisyan sang walo ka mangunguma. Pila ka tuig nga wala nahulagan ang lugar gani nauntat ang paglunsar sang mga paghimakas agraryo didto. Pero sang maareglo liwat ang organisasyong masa liwat man bumwelo ang mga rebolusyonaryong paghulagl ilabi na sa antipyudal nga paghimakas. Napanubo sang masobra 50% ang

tantos sa usura bunga sang madi-nalag-on nga pagbato sa dalagku nga usurero-komersyante sa lugar nga daan nagapautang sang may 30% interes kada bulan. Tatlo ka magkaiping nga baryo ang naghu-lag para sini.

Sa duha ka banwa diri, 3,150 mamu-mugon sa uma ang na-kabenepisyo sang ma-pataas ang suhol halin P1,200 kada ektarya sa 15 katawong naga-tanom (14 mamu-mugon sa uma kag isa kabiselya) pakadto P1,400-P1,500 kada ektarya. Napatuman

ini sa walo ka baryo. Ginabanta nga indi magnubo sa 2,000 ektarya ang sakop sang ulumhan nga ginatam-nan sang mga nabeneписыuhan.

Isa ka malapad nga irigasyon sa isa ka baryo ang ululupod ginaa-reglo sang 100 katapu sang Pam-bansang Katipunan ng Magbubu-kid. Malab-ot sa gatos ektarya ang natubigan.

Sa Nueva Ecija kag iban pa nga lugar sa Central Luzon, katuwang man sang mga paghimakas agraryo ang paghimakas batuk sa militarisa-syon. Bangud tagapangapin sang mga agalon nga mayduta kag iban pa nga mapanghimulos nga sahi ang reaksyunaryong militar, dungan nga ginbatuan man sang masang mangunguma ang pagpamintas kag pagpanghalit sang AFP sa umpisa, sa katung-anan kag matapos ang mga kampanyang antipyudal.

Iban pang prubinsya. Sa Bu-lacan, naduso ang pagpanubo sang pasahe sang sitaw, napataas ang presyo sang uling, napusisyu-nan ang pila ka napabayaang nga duta kag ginbatuan ang pagpalayas sang agalon nga mayduta. May na-lunsar man nga organisadong pag-pangapa (pagpangdakup sang isda ukon lukon paagi sang mga ka-mot), pagpataas sang sustento

ukon suhol sang bantay-palaisdaan halin P3,000 pakadto P4,500, pag-pataas sang arkila sa mananambak halin P120 pakadto P150.

Sa Pampanga, napasulong ang paghimakas para sa pagpataas pre-syo sang produkto sang mga Aeta

nga nagakaingin. Pa-dayon man nila gina-kampanya sa kabuki-ran ang pagtanum kag produksyon sang hu-may.

Napadaug man sang mga mangungu-ma sa isa ka baryo ang pagpabilin sa duta nga daan na nilang na-pusisyunan bisan na-

tindungan na sang isa ka malahal-on nga subdibisyon ang iban nga ba-hin sang duta. Samtang, padayon gihapon ang rehabilitasyon sa duta nga natambakan sang lahar sang maglupok ang Mt. Pinatubo sadtong 1991. Halin sa daan nga 80 ektarya, maabot na sa 200 ektarya ang naku-haan sang balas kag mahimo na ihanda para sa liwat nga pag-uma. Napadayon man ang paghimakas sa pila ka baryo sa wala untat nga quarrying (paghakot) sang balas nga nagaresulta sa pagmala sang tubig para sa mga ulumhan.

Sa Tarlac, napataas ang parte sang mga agsador sa isa ka agalon nga mayduta halin sa daan nga 50-50 pakadto sa 75-25 kag nahatag ang iban pa nila nga demanda.

Ginpusisyunan man sang mga mangunguma ang kadutaan sang isa ka *absentee landlord*. Isa pa ka grupo sang may 100 mangunguma ang umokupar sa ginbayaan nga duta. May nalunsar man nga paghi-makas para sa indi magbayad sa duta nga residensyal nga gin-agaw lamang sang isa ka agalon nga mayduta, kag paghimakas batuk sa pagpanghakab sa komunal nga *pisqueria* ukon pangisdaan.

Organisado man nga nabawi sang 56 pamilya sa Zambales ang

480 ektaryang gin-agaw sang mga agalon nga mayduta halin sa masa. Padayon man ang kampanyang ba-yanihan sa pagpalapad sang *gasak* para sa pagpataas sang lebel sang produksyon kag pangabuhian sang masa. Madinalag-on nga nakipag-negosasyon ang mga imol nga ma-ngunguma sa magagmay nga aga-lon nga mayduta sa plano sini nga saraduhan ang dalan sa uma. May ara man okupasyon sa apat ka ek-taryang duta sang *absentee land-lord*. Ginhimo ini nga komunal nga ulumhan sang 22 mangunguma. Gin-okupar man sang mga mangu-nguma ang kadutaan nga ginatag-iyahan sang duha ka agalon nga mayduta.

Sa Bataan, napataas ang presyo sang mga produkto sang masang Aeta. Nasuguran na sa pila ka lugar ang pagpadamu sang mga binhi sang palay-sa-bukid kag gabi para makatanum pa sini. Ara man ang pag-areglo sang patubig paagi sang gamay nga dam agud mapatakas sa talamnan ang tubig, kag napaslaw ang tuyo nga palayason sa ila pusi-syon ang 15 mangunguma.

Ang pila porma sang nalunsar nga rebolusyong agraryo sa Aurora amo ang suyuan sa pagtapas kag pagkaingin, paghimo sang komunal nga pananum kag pagpusisyon sa nabayaan nga duta kon sa diin 300 pamilya ang nakabenepisyo.

Pang-umpisa pa lang ang na-sambit nga mga kadalag-an. Pada-yon ang pagtinguha sang rebolu-syonaryong kahublagan sa Central Luzon nga palaparon pa ang sakup sang rebolusyong agraryo sa bilog nga rehiyon agud masabat ang mga problema kag handum sang masang mangunguma kag mangin malig-on sila nga kuta sang rebolusyon. **AB**

Ang pagbilog nga ini sang mga kampanya antipyudal ginkuha sa mga report sang Himagsik, rebolu-syonaryong pahayagan sang Central Luzon.

Ka Argie: hangaway nga medik, dentista kag siruhano

Bunga sang pagpursiger kag pagsistematisa sang Bag-ong Hangaway sa mga paghanas sa hilikuton medikal, kabahin subong sa kubay nga si- ni ang ginatos nga medik, dentista kag siruhano (*surgeon*). Ang ila kinaalam kag ikasarang pat-ud nga dayawon bisan sang mga propesyunal kag beterano nga manugbulong nga nakatuon-on sang medisina sa mga unibersidad. Ang natipon nga eksperensya sang mga Pulang medik sa pagpamulong kabang-maggad sa medisina kag syensa nga gilayon makaalagad sa mga rebolusyonaryong pwersa kag sa pumuluyo.

Isa si Ka Argie sa mga medik sang BHB.

Sa edad nga 35, manggaran na ang inagihan ni Ka Argie bilang hanngaway, medik kag siruhano. Halin sa sahing mangunguma, siya nagsugod maghulag bilang kabata-ang aktibista sadtong 1982 sa ila baryo sa Cagayan Valley.

Wala magdugay nagdesisyon siya nga magpatapu sa BHB. Bisan wala pa siya sang anuman nga kaalaman sadto sa hilikuton medikal, siya ginombrar nga medik sang yunit nga ginapatapuan niya. Sa tunga sang mga paghanas pangpulitika kag pangmilitar, si ka Argie nagagi sa maid-id nga paghanas sa hilikuton medikal sa pagpanguna sang pila nila ka kaupod sa yunit.

Sugod sadto, si Ka Argie nagserbi nga Medical Officer (MO) sang nagkalain-lain n ga yunit sang BHB nga iya nadeployan. Sadtong mga tuig sang indi napanahon nga regularisasyon kag masingki nga armadong inaway sa tungan sang BHB kag AFP, nabaid ang kahanasan ni Ka Argie bilang siruhano, ilabi na sa pagbulong sang mga pilas nga tuga sang tama sang bala.

Sa paglunsar sang kahublagan pagpanadlong kag pagbalik sa husto nga tum-ok kag panahon sang BHB sa pag-organisa sa masa, na-

baid man ang iba pang aspeto sang kaalaman medikal ni Ka Argie. Sa yunit sa hilikuton masa, kabahin sang matag-adlaw nga hilikuton ang pagtsek-ap sa mga tagabaryo kag paghatag sang gilayon nga tambal sa mga natumod nga bala-tian. Ang paghatag sang amo nga mga serbisyo medikal sa masa isa sa hugot nga katungdanan sang BHB bilang tunay nga hangaway sang banwa.

Sa masobra duha ka dekada bilang Pulang hangaway kag manugbulong, naglapad pa ang kaalaman kag ikasarang ni Ka Argie sa patag medikal. Nakahibalo man siya mangin dentista. Nakalimpyo kag nakagabot ngipon na siya kag nakahimo sang pustiso.

May ara man siya kaalaman sa pag-analisa sang ihi kag dugo kag pati sa pagsukat sa grado sang mata.

Bilang siruhano, luwas sa manggaranon nga inagihan sa pag-opera sang mga tama sang bala, nakaagi man siya mag-opera sang mga luslos kag *cyst*. May eksperensya man siya sa *amputation* ukon pagputol sang kamot ukon paa kon wala na sang iban nga posibleng bulong.

Nakatakod man si Ka Argie sang asero nga *stainless* agud kumpunihon ang nabali nga tul-an sang isa ka pasyente. Luwas sa kahanasan



sa pagsemento sang mga nabali nga tul-an, may kahanasan man siya sa *bone grafting* ukon pagsugpon sang tul-an gamit ang tul-an halin sa iban nga parte sang lawas.

Nakaupod man si Ka Argie sa pag-opera sang mata, sa partikular, sa pagbutang sang artipisyal nga mata. May yara man siya eksperensya sa *skin grafting* ukon paggamit sang panit sa isa ka bahin sang lawas agud itukap sa iban nga parte nga natuklapang panit.

Ang nagapadayon nga pag-uswag sang kaalaman kag kahanasan ni Ka Argie pamatuod sang maid-id nga atensyon kag paghatag importansya sang BHB sa hilikuton medikal.

"Ang hilikuton medikal kabahin sang hilikuton masa sang BHB," si-ling ni Ka Argie. Ginasentruhan si- ni indi lang sa mga kinahanglanon pangkombat, kundi pati sa pagtukod kag pagpalig-on sang baseng masa, dugang pa niya.

Suno pa sa iya, "indi man amo kataas ang lebel sang espesyalisasyon sang BHB sa patag medikal, daku katama kag malapad ang neto nga kaayuhan sang pumuluyo." Sa bulig sang hilikuton medikal sang BHB, ang ginapalapad kag ginapalig-on nga baseng masa sang BHB nagaserbi nga salandigan sang pagpauswag sa kahanasan medikal lunsay sa hangaway sang banwa kag sang pumuluyo. AB


Sistemang edukasyon sa idalum sang rehimeng Arroyo

Sa tatlo ka tuig nga pag-alagad ni Gloria Arroyo, wala sini ginhimo nga prayoridad ang edukasyon sang pamatan-on. Sa baylo nga pas-anon sang gubyrno ang responsibilidad sa pagpasanyog sa sistema sang edukasyon, yara sa programa sini ang sistematikong pagpabaya sa edukasyon. Nagasanto ang pagpabaya nga ini sa dikta sang IMF kag World Bank nga talikdan sang rehimen ang mga serbisyo sosyal agud maalokar ang badyet sang gubyrno sa pagbayad sang utang.

Sa gintalana nga pungsodnon nga badyet para sa subong nga tuig, P130 bilyon lang ang gin-alokar sa edukasyon ikumparar sa pangbayad-utang sang pungsod nga P541 bilyon. Kulang gid kaayo ang kantidad nga ini para sa mga kinahanglanon sang mga estudyante. Bangud diri, ginabatas gihapon sang mga estudyante kag manunudlo sa mga pangpublikong eskwelahan ang kakulangan sa mga pasilidad, kagamitan kag personel. Suno mismo sa Department of Education, subong nga abre kulang sang 39,383

hulot-klasehan; 4,125,413 lamesa; 9.88 milyong libro kag 49,212 manunudlo. May abereyds gihapon nga 60 estudyante para sa kada isa ka manunudlo. Suno sa isa ka pagtuon nga ginhimo sang gubyrno mismo sa kubay sang 400,000 manunudlo, 55% sang mga eskwelahan ang wala kuryente, 84% ang wala suplay sang tubig kag 38% ang wala kasilyas. Suno sa 25% sang mga sinarbey nga manunudlo, wala kisame ang ila mga hulot-klasehan.

Bangud man sa kakulangan sa mga manunudlo, kadam-an nagtudlo sang mga subject nga indi nila ginhanasan. Bangud sa kada tuig



nagadaku ang numero sang mga dapat magtuon, labing nagalala ang kakulangan sa mga nasambit.

Pareho sang mga pribadong eskwelahan, nagataas ang matrikula kag iban pa nga balayran sa mga pangpublikong kolehiyo kag unibersidad. Nakaugalian na ang indi pagreport sa mga pagtaas nga ini sa Commission on Higher Education (CHED). Ginabangdanan sang mga administrador sang eskwelahan ang pag-enganyo sang gubyrno nga pataason ang mga balayran sa mga serbisyo nga dapat libre. Kag sa kamatuoran, luwas sa pagtaas sang mga balayran, ginaenganyo sang gubyrno ang komersyalisasyon sang edukasyon paagi sa pagbaligya sang propyedad sang mga eskwelahan pareho sang duta) kag sang pakigsosyo sa mga pribadong negosyo. Isa ka halimbawa sang amo nga sosyohan ang isa ka unibersidad sa Northern Luzon kon sa diin lakip sa administrasyon ang burges-kumprador nga si Lucio Tan.

Indi mapunggan sang rehimen ang tuigan nga pagtinaas sang matrikula kag iban pa nga mga balayran sa mga pribadong eskwelahan. Sa subong nga abre, base pa lang sa mga nakareport sa CHED, nag-abot na sa 214 ang mga pribadong kolehiyo kag unibersidad nga nagtaas sang matrikula sang 11.39% ukon P313.24 kada yunit.

Mapaniplang ang ginasiling sang CHED nga ang 214 amo ang 16% lang sang kabilugan nga numero sang mga pribadong kolehiyo kag unibersidad sa pungsod.

Ang matuod, wala pa sang report ang madamu nga eskwelahan nga nagtaas man sang matrikula lakip ang mga yara sa Ilocos Region, CAR, Central Luzon, Southern tagalog kag Bicol. Wala ginasambit sang CHED ang mas madamu pa nga eskwelahan nga nagtaas sang *miscellaneous fees* sa baylo sa *tuition fee*.

Sa kadam-an nga eskwelahan,

kon anu-ano nga hokus-pukos ang ginahimo agud matigayon ang pag-hilera sang sarisaring balayran. Wala ginapaathag sa mga estudyante ang magkapareho nga balayran. Halimbawa sang mga ini ang *sports fee*, *athletic fee* kag iban pa nga balayran pareho sang *development fee*, *parking fee*, *copier fee*, *late enrolment fee* kag iban pa.

Sa madamu nga kaso, kon tingubon mas daku pa ang gintaas sang sarisaring balayran sangsa matrikula. Wala ginaobligar nga ireport sa CHED ang pagtaas sang sukot sa mga ini.

Makasulod man sa eskwelahan ang mga bata kag pamatan-on, ginapabudlayan sila sa wala ikasang sang ila mga pamilya nga mapun-an ang kinahanglanon sa transportasyon, pagkaon sa eskwela kag mga kagamitan. Wala pa gihapon ginahatag sang rehimen ang pila ka tuig na nga ginademanda nga P125 dugang nga sweldo sang mga mamumugon kag P3,000 nga dugang

Pondo sang Pasista

Athagon nga ginadingut sang rehimen sa pamatan-on ang kinamatarung nila sa libreng edukasyon. Ang mga manunudlo naman ginapatiis sa tuman kanubo nga sweldo. Samtang, todo-hatag naman ini sa mga ginapangayo sang AFP kag PNP. Masunod ang pila ka alokasyon para sa AFP kag PNP sadtong nagligad nga tuig:

- ▶ P3 bilyon dugang nga sweldo sang mga elemento sang AFP
- ▶ P2.1 bilyon dugang nga sweldo sang mga pulis
- ▶ P1.4 bilyon para sa CAFGU
- ▶ P1.2 bilyon para sa mga bag-ong pulis, *jail guard* kag bumbero
- ▶ 1.1 bilyon para sa pensyon sang mga retiradong militar
- ▶ P800 milyon para sa mga bag-ong mersernaryong suldado
- ▶ P96.3 milyon para sa Balikatan *exercises*.

sweldo sang mga empleyado sang gubyerno. Ang nagapagamay nga matuod nga balor sang suhod kag sweldo, kadungan sang pagtimbuok sang langis, kuryente kag iban pa nga kinahanglanon, labi lamang nagadingot sa pamatan-on sang kinamatarung makabutho.

Suno sa isa ka report, 1.7 milyon sang mga bata nga edad 7-12

ang indi makaeskwela. Halin sa walong milyon nga pamatan-on nga dapat yara sa kolehiyo, 2.3 milyon lang ang aktwal nagaeskwela. Suno naman sa isa ka pagtuon sang Ateneo de Manila University, sa kada 100 bumulutho, 66 lang ang nakatapos sang elementarya, 42 sang hayskul kag 14 lang ang nakatapos sang kolehiyo. AB

Mga pakitang tawo ni Arroyo

Ginapabugal sang rehimen ang duha ka programa si-gni sa edukasyon. Ginlunsar ang mga pakita-tawo nga programa nga ini sa ulihi nga bahin sang pag-alagad ni Gloria Arroyo sa malaut nga tuyo nga kuhaon ang boto sang mga estudyante kag ila mga ginikanan. Ginlunsar ang Iskolar sa Bawat Mahirap na Pamilya sining Abril lang. Ginumpisahan naman ang Student Assistance Fund for Education for a Strong Republic (SAFE 4 SR) sadtong temprano nga bahin lang sining tuig.

Nakadisenyo ang duha ka programa sa edukasyon para sa mga estudyante sa kolehiyo, nga yara sa edad para bumoto, labi na ang SAFE 4 SR nga para sa mga yara sa ikatlo kag ikaapat nga tuig.

Sa idalum sang Iskolar sa Bawat Mahirap na Pamilya, limang milyon kuno nga tumuluon ang mangin iskolar sa sulod sang duha ka tuig sa anuman nga pangpublikong kolehiyo ukon unibersidad, ukon pwede patapuson sang duha-ka-tuig nga kursong teknikal ukon bokasyunal. Sistemang *study-now, pay later* naman ang SAFE 4 SR, nga magapautang sang pondo para sa mga estudyante nga yara sa ikatlo kag ikaapat nga tuig agud makabayad sa eskwelahan kag

sa gini makatapos kuno sang pagtuon.

Pabor ang programa ni Arroyo sa mga kapitalista nga tag-iya sang mga pribadong eskwelahan bangud pat-ud gihapon nga makabayad sang matrikula ang mga estudyante nga benepisyaryo bisan magtaas pa ang mga balayran. Pero luwas sa gamay man lang ang numero sang mga tumuluon ang makabenepisyo, linibo pa nga estudyante ang mapilitan mag-untat bangud sa daku nga mga galastuhan.

Ang daku nga palamangkutanon amo nga kon sa diin kuhaon ni Arroyo ang binilyon ka pisos nga kinahanglanon niya para gastuhan ang ambisyosong proyekto nga ini kay tuman kadaku na sang depisit sa badyet sang gubyerno. Ang nagasulod sa pamin-saron sang madamu, isa na naman ini nga engrang-deng paniplang indi lang para kuhaon ang boto sang mga estudyante kundi mapakalma man ang nagain-dakal nila nga balatyagon sa grabe nga pagpatumba-ya sang gubyernong Arroyo sa ila kaayuhan. Kon usisaon, paltik ang programa nga ini bangud nagakadapat lang nga libre ang edukasyon para sa tanan nga tumuluon. AB



Papet nga gubverno, gintukod sa Iraq

Sadtong Hunyo 28, ginpwesto sang US ang isa ka papet nga gubverno ng Iraq paagi sa isa ka seremonya sa Baghdad. Kadungan sini, pormal nga gindula sang US ang Coalition Provisional Authority (CPA), ang kolonyal nga administrasyon nga nagahari-harian sa Iraq sa nagtaliwan nga 14 bulan. Ginombrar nga *prime minister* si Iyad Allawi, isa ka operatiba lunsay sang CIA kag MI-6 sang UK bisan sadtong katapu siya sang partidong Ba'ath ni Saddam Hussein.

Padayon nga ginapangibabaw sang US ang kolonyal nga gahum sini sa Iraq. Kadungan sang pagpangungko kay Allawi bilang *prime minister*, padayon ang aktibong pagrekrut kag paghanas sang papet nga armadong hangaway nga mangin pangunahong sandigan sang neokolonyal nga gahum sang US sa Iraq, hugakumon ang manggad sining langis kag gamiton ini nga tungtungan sa pagginahum sa bilog nga Middle East.

Samtang ginakonsolida sang US ang neokolonyal nga gahum sini sa Iraq, yara sa interes sini nga ipabilin ang mga mapanakop sining tropa sa Iraq. Antes siya maghalin, ginpat-ud ni CPA Administrator Paul Bremer nga indi pwede pahalinon sang papet nga gubverno ang 146,000 tropa sang US. Bisan nakapwesto na ang papet nga gubverno, padayon nga nagaserbi nga sentro sang kolonyal nga pagginubverno ang embahada sang US sa Baghdad. Pagapadayunon sang bag-ong talana nga ambasadador nga si John Negroponte ang daan nga papel ni Paul Bremer. Angot diri, igadeploy sang US ang magaabot sa 3,000 tinawo agud magpasilabot sa nagkalain-lain nga patag sang hilikuton sang papet nga gubverno, siguruhon ang pribatisasyon sang ekonomya sang Iraq kag ipatuman ang mga reporma pang-ekonomya nga labi magpahugot sa kontrol sang

mga kumpanyang Amerikano sa pungsod.

Pangunahon nga katuyuan sang US ang pagkontrol sang US sa mga reklamo kag kita sa langis sang Iraq. Kadungan kag katimbangan man sini, ipabilin sang US ang kontrol sini sa tanan sang mga pribilehiyo sa negosyo kag mga kontrata nga ginahatag sa mga paboritong kroni sang gubverno ng Bush sa kuno rekonstruksyon sang mga ginagamad sang gera sang US kag ang pagsuplay sang mga kagamitan militar sang US sa Iraq. Ginasiiguro sang US nga ang mga ini indi mabayluhan sang bag-ong papet nga gubverno. Ginpalig-on na ang mga layi bahin t sa operasyon sang mga korporasyon lakip ang hayag nga pagbawal sang mga welga.

Kadungan sini, padayon nga nagasingki ang armadong pagbato sang pumuluoyong Iraqi kag nagalapad ang ila nagahiliugyong prente sang mga rebolusyonaryo kag rebel-deng pwersa nga nagatay-og sa pagginahum sang US sa Iraq. Pada-

yon sila nagabangon sa pihak sang wala untat kag madamuan nga pagmasaker, pagpangbomba kag pagpanamad kag tuman nga pagpamigos sang mga pwersang US sa pumuluyo sang Iraq. Determinado sila nga mag-away agud silutan ang mga mananakop kag mga traidor nga papet kag kuhaon ang pungsod nila sa mga mananakop.

Ginaatake nila ang mga pwersa, pasilidad kag lohistika sang militar, pulisya, mga kontratistang pangseguridad kag burukrasya panggubverno sang US, mga alyado sini sa pagpanakop sa Iraq kag sang papet nga gubverno sa Iraq. Ang nagadaku nga

kahalitan nga ginaangkon sang US nagapabas-kog sang panawagan sa sulod kag guwa sang US nga pahalinon na ang mga tropa sini sa Iraq. Samtang nagalala ang krisis sang paghari sang US sa Iraq labing mas paborable para sa pumuluyo kag mga rebolusyonaryong armadong pwersang

Iraqi nga bunalan lunsay ang mga pwersa sang US kag ang mahina pa nga papet nga gubverno sini. Ang mga tropang Amerikano kinahanglan na subong magpirmi sa ila mga kam-po mangin mas madali nga target sang mga armadong pwersang Iraqi.

Maathag sa pumuluyo kag rebolusyonaryong Iraqi nga solo ang ila determinadao kag malapanagon nga mapaghaliway nga armadong pagbato ang makapahalin sa mga dumuluong nga mananakop kag makapabalik sang soberansya kag katawhayan sa Iraq.



2 martir sang BHB, ginpasidunggan sang NDF sa Mindanao

GINPASIDUNGGAN sang National Democratic Front-Northern Mindanao sanday Geril Manggubat, tagapamaba sang Pulang Diwata Command, kag Ka Johnny, isang Pulang hangaway, sadtong Hunyo 21. Napatay ang duha matapos ang madi-

nalag-on nga reyd sa istasyon sang PNP sa Bayugan, Agusan del Sur sadtong Hunyo 19. Naabtan sila sang reimporsment sang PNP samtang nagaatras halin sa lugar sang inaway. Nagaserbing inspirasyon ang ila mga kabuhi sa dugang pa

nga pagpasingki sang aramdong paghimakas sa rehiyon.

Nakakumpiska ang Red Alimaong Platoon sang pitong M16, lima M14 kag mga bala sa nasambit nga reyd. Duha ka tropa sang PNP ang napatay.

Mga bag-o nga kaso sang pagpamigos sa hilway nga pagpahayag, nabuyagyag

NAGABASKOG ang pagpamigos sa hilway nga pagpahayag sa pungsod. Pila ka simana lang ang nakaligad nga gintugtan makabalik sa ere ang Bombo Radyo-Isabela, isa naman ka programa sa radyo ang ginpauntat sang militar kag pulisya.

Sadtong Hunyo 23, pwersahan nga ginpahalin sa ere ang Radyo Anakpawis, isa ka simanal nga programa sang Samahang Magbubukid sa Timog Katagalugan, nga ginapalayag sang istasyon sang DZRB sa Batangas City. Suno sa militar, ang Bag-ong Hangaway sang Banwa kuno ang nagamentenar sang programa. Ginpauntat man ang pag-atake sa gubyernong Arroyo.

Nagpabutyag sang pagpamatuk sa pagpamigos sanday Danny Debolgado, manidyer sang DZRB, kag

Orly Marcellana nga byudo sang ginpatay nga tagasakdag sang tawhanon nga kinamatarung nga si Eden Marcellana. Ginpadayon nila ang pagbrodkas sang programa sa pihak sang pagpamahog sang mga militar kag pulis nga pagareydon nila ang istasyon.

Sa Mindanao, mabaskog nga ginkundenar sang Bagong Alyansang Makabayan-Socsargen Chapter ang pagpatay kay Ely Binoya, komentarista kag manidyer sang DZRH-Radyo Natin sa prubinsya sang Saranggani, sadtong Hunyo 17. Duha ka simana antes siya pasyon sa Barangay Batomelang, ginbakol siya sang mga paryente ni Mayor Teodoro Padernilla sang Malungon. Ang kaso ni Binoya ika-15 nga dokumentadong kaso sang mga peryodista nga pinatay samtang nagatungod sang ila trabaho umpisa 2001.

Anum ka paghanas militar sang US kag AFP, hiwaton umpisa Hulyo

NAKATALANA umpisahan ang serye sang mga "gintingub nga paghanas" sang AFP kag mga tropang Amerikano para sa tuig 2004 sa maabot nga Hulyo 26 sa Carmen, North Cotabato. Magalawig tubtub Agosto ang paghanas nga ini. Hungod nga ginpili sang US ang Cotabato bangud sa madamu nga presensya sang Moro Islamic Liberation Front (MILF) nga ginaakusahan sini nga nagahimbunanay sa Jemaah Islamiyah (JI), isa ka grupo nga ginkabig sini nga terorista. Pareho sang nagtaliwan nga mga paghanas, gintapalan sang US kag sang AFP ang presensya sang mga rehinyunal nga terorista agud ihinago ang ila armadong pagpasilabot sa

mga halambalanon sangpungsod.

Para bilog nga tuig, lima ka paghanas pa ang natalana hiwaton.

(1) Fusion 04-2 nga magaumipisa sa ikaduhang simana kag magatapos sa ikatlong simana sang Hulyo, suno sa AFP Information Office. Maupod sa paghanas batuk sa narkotiko kag kontra-terorismo ang US Navy kag Joint Interagency Task Force West, Philippine Drug Enforcement Agency, Philippine Navy kag Coast Guard. Pagahiwaton ini sa Subic Bay, Zambales at sa erya sang Southern Command sa Western Mindanao.

(2) Balance Piston ukon paghanas sang *light infantry battalion* sa 6th ID Training Unit sa Carmen, Co-

tabato City halin katapusan nga simana sang Hulyo tubtub katapusan nga simana sang Agosto. Mga 150 tropa sang Amerikano kag Special Forces sang AFP ang magapasakup.

(3) CARAT ukon Cooperation Afloat Readiness and Training sang katapu sang US kag Philippine Navy sining Hulyo man.

(4) US-RP Maritime Surveillance Exercises (Marsuvex) nga magumpisa sa paghanas sang 100 personel sa paggamit sang mga salakyan pangkahanginan kag pangdaga sa una nga simana sang Agosto.

(5) Palah exercises sa ulihi nga kwarto sang tuig para sa mga katapu sang US Navy kag Special Warfare Group sang Philippine Navy.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXV No. 13
Hulyo 7, 2004
www.philippinerevolution.org

Editorial

Pahabok kag mapaniplang ang 10-punto programa sang rehimeng Arroyo



Isa ka pahabok kag pagpaniplang ang ginapabugal ni Gloria Arroyo nga 10-punto nga programa. Wala ini sang iban nga tuyo kundi tiplangon ang pumuluyo kag takpan ang pagka-inutil sang rehimen nga sakdagon ang interes sang kadam-an nga pumuluyo. Dala sini ang mas masingki nga pagpanghimulos kag pagpami-gos sa pumuluyo sang mga buyong nga dalagku nga dumuluong kag lokal nga kapitalista, asendero kag buruk-rata kapitalista. Wala ini sang iban nga igadul-ong sa pumuluyo kundi dugang nga kaimulon kag pagpami-gos.

Luwas sa mas matayog kag labing indi mapatihan nga mga pangako, ang 10-punto nga programa ni Arroyo wala sing kinalis sa daan nga paltik nga mga promisa nga bungat niya sa iya *state of the nation address* sad-tong Hulyo 2003. Wala sang natuman anuman didto. Pat-ud nga wala man sing malauman sa bag-o niya nga deklarasyon.

Padayon ang malaparan nga pag-kawasak sang mga produktibong pwera kag pagtibusok sang produk-syon. Ginasisagahum maabot sa P200 bilyon ang depisit sa badyet. Padayon

**Mga tampok
sa isyu nga ini...**

**Sugilanon pangkalinu-
ngan, nakapahina-buot**
PAHINA 3

Chacha, adyenda sg US
PAHINA 4

**Ka Argie: Hangaway
nga medik** PAHINA 8

Mga instruksyon sa pag-imprenta

1. Ang **pahina 13**, nga eksakto nga kopya sang pahina 1 maluwas sa mas malus-aw ang *masthead* ukon *logo* amo ang para sa mga nagagamit sang *mimeo machine* ukon naga-imprenta paagi sa *v-type*. Gindisenyo ini para indi madali masamad sang istensil.
2. Pag-imprenta sa istensil:
 - a) Sa *print dialog*, i-check ang **Print as image**
 - b) Kuhaon ang *check* sa **Shrink oversized pages to paper size**
 - k) I-click ang **Properties**
 - d) I-click ang **Advanced**
 - e) Siguruhon naka-set sa **100%** ang **Scaling**
 - g) Padayunon ang *pag-print*
3. Ginabuyok ang mga kaupod nga ipaabot sa patnugutan sang *AB* ang anuman nga problema kaangot sa pag-imprenta paagi sang *v-type*. Magpadala sang *e-mail* sa *angbayan@yahoo.com*